

# KTDI SEMARAK JIWA MERDEKA

OLEH: SITI NUR AIN KAMARUDIN

SERDANG, 21 Sep - Majlis Perwakilan Kolej (MPK), Kolej Tun Dr Ismail (KTDI) sesi 2021/2022 dengan kerjasama pihak pengurusan Kolej Tun Dr Ismail dan Bahagian Hal Ehwal Pelajar, Universiti Putra Malaysia (UPM) telah menganjurkan program Karnival Dirgahayu Malaysia (KDM) pada 14 Ogos hingga 16 September 2021 secara atas talian yang berjaya menarik penyertaan melebihi 300 orang pelajar dan komuniti.

Pengarah KDM, Siti Nur Ain berkata, tujuan program ini dilaksanakan adalah untuk meraikan tarikh-tarikh keramat yang berlaku di negara kita iaitu sambutan Hari Kemerdekaan pada tanggal 31 Ogos dan juga Hari Malaysia yang disambut pada 16 September setiap tahun bersesuaian dengan keadaan semasa norma baharu yang melanda negara pada hari ini.

"Sambutan Hari Kebangsaan juga bukan sekadar peringatan sejarah kemerdekaan negara tetapi perlu dilihat sebagai usaha mengisi kemerdekaan, dengan harapan, para pelajar dapat memupuk jati diri dan semangat patriotisme yang tinggi" kata

Encik Shahriman Hashim, Ketua Pentadbiran Pejabat Timbalan Naib Canselor (Hal Ehwal Pelajar dan Alumni) merangkap perasmi Majlis Perasmian Penutup Karnival Dirgahayu Malaysia.

Beliau berkata, perpaduan yang diterapkan haruslah sentiasa dipupuk dan dipelihara dalam diri agar kemerdekaan yang dikehendaki dapat dikekalkan dan terus harmoni buat selama-selamanya.

Pelbagai aktiviti yang disajikan sepanjang sebulan KDM berlangsung, antaranya sembang santai dimana terdapat 2 panel iaitu Prof Dr Suhaimi, Pengarah Putra International Centre (i-PUTRA) dan En Nazri Noh, Pegawai Tugas-Tugas Khas YAB merangkap Alumni KTDI yang dijemput bagi mengupas topik Malaysia Prihatin, KTDI Jom Lepak dan Majlis Perasmian Penutup Karnival Dirgahayu Malaysia.

Selain itu, terdapat juga pertandingan yang dijalankan sepanjang karnival ini berlangsung iaitu KTDI Design & Tale Merdeka, Tarian Malaysiaku Challenge, Cerita Saya, Cerita Kita dan pertandingan pantun bertemakan Unsung Heroes.

Kesemua pertandingan ini mendapat sambutan yang hangat di kalangan pelajar dan komuniti luar memandangkan sijil, merit dan hadiah misteri menanti setiap pemenang.

Diharapkan Karnival Dirgahayu Malaysia ini mampu menyemai semangat cinta akan negara yang jitu kepada semua yang terlibat secara langsung maupun tidak serta menjadi simbolik meraikan Hari Kemerdekaan ke-64 negara tahun ini.



Sesi bergambar Majlis Perasmian Penutup Karnival Dirgahayu Malaysia bersama tetamu VIP